

Website chori ki tafseeli report

Biraadaraan-e-Qaum Salamun Alaykum,

Jaisa ke aap sab jaante hain ke September 2021 mein Syed Yusuf Tajammul, Mahmood Mukarram aur chand deegar shar pasand afraad ne Qaum-e-Mahdavia ki khidmat ke liye banaayi gayi website Khalifatullahmehdi.info ko nakaara bana kar qaum ko us ke ek qeemati asaase se mahroom kar diya tha. Is tamaam waqiya ki rudaad ko qaum ke saamne pesh karna nihayat zaroori hai ta ke log haqeeqat se waaqif hojaaen lihaza yahan waqiye ki tafseeli report pesh ki ja rahi hai.

2020 mein Khalifatullahmehdi.info ke baani aur maalik ki haisiyat se main ne apni hosting services tabdeel karne ka faisla kiya aur is kaam ke liye Splendid Planners & Developers ke Syed Yousuf Tajammul ne apni khidmaat pesh ki aur us ne khud ko Hostinger web hosting services ka sub-agent zaahir kiya tha. Main ne Tajammul par aetemaad kiya kyunke wo khud ko ek pakka Mahdavi aur Qaum ke ek Mashhoor murshid Hazrat Syed Miranji Abid Khundmiri sahab Ahl-e-Chanpatan ka pur-josh mureed o motaqid pesh karta hai. Lekin Tajammul ne mere ilm ke baghair chand deegar saazishi shuraka ke hamraah chori chhupe aur faraib se website ke domain ke credentials apne naam kar liye aur ye jurm ek saal tak chhupaae rakha.

Is ke baad 2021 ke wast mein Team Khalifatullahmehdi ne apna homepage update karne ka faisla kiya jis par hamaare Aaqa Imamuna Mehdi-e-Maood AS ki wo naql jo Naqliyat Miyan Abdur Rasheed mein manqool hain aur usi se mutalliqa Qaum-e-Mahdavia mein Markazi o buniyaadi haisiyat rakhne waali kitaab Aqeeda Shareefa muallifa Hazrat Bandagi Miyan Syed Khundmir Siddiq-e-Vilayat RZ se chand iqtebasaat pesh kiye gaye the jin mein Qaum-e-Mahdavia ke is markazi o muttafiq alaih aqeede ko pesh kiya gaya tha ke Quran-e-Majeed ko deegar tamaam nusoos par hatmi taur par sabqat aur ghalba haasil hai. Is ke saath hi homepage par ek YouTube video (<https://www.youtube.com/embed/pwsbBAht8uU>) bhi nashar ki gayi thi jis mein Hazrat Syed Muhammad Sarfaraz Mehdi Tashrifullahi sahab ne isi mauzoo par guftagu farmaayi thi.

Lekin hamaare Imam AS ka farmaan-e-aali-shaan Tajammul aur Mukarram par giraan guzra aur Tajammul ne website ke web developer Biradaram Muhammad Ibrahim Sahab se raabta kar ke unhen apne guzishta saal ke jurm se aagaah kiya aur Muhammad Ibrahim Sahab ko dhamkaaya ke agar 6 ghanton ke andar homepage par maujood content nahin hataaya gaya to wo DNS server link manqata kar ke sarifeen aur deegar qaumi biraadaraan ke liye website ko nakaara kar dega. Ye baat kisi ke wehm-o-gumaan mein bhi nahin thi ke ham ek aise shakhs ke haathon faraib ka shikaar hojaaenge jo khud ko ek naik Mahdavi pesh karta aya hai aur ye ke qaum ki khidmat ke liye banaayi gayi website aise na-hinjaar shakhs ke haathon yarghamaal hojaaegi. Is ke baad us ne apni 6 ghanton ki ghair-qanooni aur na-jaaez miyaad khatam hone se bohat pehle hi website ko nakaara kar diya.

Waazeh rahe ke website ko nakaara karne se pehle hi Tajammul, Mukarram aur un ke saathi ek munazzam mansoobe ke taht website ko badnaam karne ki koshish kar rahe the. Is koshish ka

ek qaabil-e-zikr waqiya ye hai ke Khundmir Musheerabadi ne ek video bana kar social media par nashr ki jis mein website ko ye keh kar badnaam kiya ke Khalifatullahmehdi Qaum-e-Mahdavia ki website nahin rahi. Is waqiye mein qaabil-e-ghour pehlu ye hai ke us video mein us ne zakaat ke mutalliq naql parhhi lekin aadhi adhoori aur naql mein tahreef se us ki bad-diyaanati saaf zaahir hogayi. Isi tarah Najeeb Ishaqui ne Team Khalifatullahmehdi ke member Mohammed Ibrahim sahab ko email likh kar mere khilaf warghalane ki koshish ki. Isi qism ki jhoot aur faraib par mubni koshishein ye log website ko nakaara banaane se pehle se karte aarahe the.

Jab Tajammul aur Mukarram ne 5 September 2021 ko website ko nakaara kar diya to unhon ne ye daawa kiya ke unlogon ne qaum ke mafaad mein ye kaam kiya hai. Munsif mizaaj hazrat ghour karein ke kya qaum par aisa bura waqt aagaya hai ke qaum Tajammul aur Mukarram jaise be-imaan aur khaain logon ki marhoon e minnat hogayi hai ke wo chori chakaari aur dhoka dharhi se qaum ke mafaadaat poore karein? Website ko down karne ke baad Mahmood Mukarram ne mujhe apni hi website ki milkiyat se be-dakhl karne aur apne jurm par parda daalne ki gharz se ek ghair munsifaana balke zaalimaana resolution email ki jis par un donon ki khwahish thi ke main raazi hojaaun aur apni website un ke hawaale kardoon aur saath hi ye apne gunah aur jurm se haath dhoolein. Waazeh rahe ke Mahmood Mukarram, Syed na hone ke bawajood apne naam ke saath Syed likhta hai jis se us ke makr o faraib ki aadaat aur izzat-talbi ki hawas saaf zaahir hoti hai.

Ghour talab rahe ke jab Tajammul ne website par na-jayez qabza kar liya to main ne us ke murshid yaane Hazrat Abid Khundmiri sahab ko Tajammul ki chori ke mutalliq ek tafseeli khat likha aur un se is maamle mein apne mureed ki islaah aur faisla karne ki darkhaast ki. Khat ke saath hi main ne Hazrat se phone par baat ki aur saari rudaad aap ke saamne pesh ki jis par unhon ne tadjub ka izhaar kiya. Lekin us ke baad un ki sehat ki nasaazi ke chalte ye maamla un ke farzand Syed Taseen Agha sahab ke hawaale hogaya aur us ke baad tamaam muraasilat Syed Taseen Agha sahab se hi hui.

Meri jaanib se mere bhai aur numainda Aali Janab Syed Munawar Ishaqi sahab ne Syed Taseen Agha sahab se guzaarish ki ke wo Tajammul ko shaamil kar ke ek Zoom meeting karlein ta ke maamla hal hojaae lekin wo kisi wajah se is baat par raazi nahin hue. Unhon ne mashwara diya ke un ki adam maujoodgi mein Hyderabad ke teen murshideen ki saalisi ke zariye is maamle ko khatam kiya jaae. Syed Taseen Agha sahab ne hi Tajammul ka ye paighaam Munawar Ishaqi sahab ko sunaaya ke murshideen ka intekhaab hamaara hoga aur waqt aur jagah ka intekhaab Tajammul ka hoga. Main ne Munawar Ishaqi sahab ko apna numainda muqarrar kiya aur wo is kaam ke liye raazi ho gaye. Unhon ne saalisi ke liye teen murshideen se guzaarish ki aur unhen raazi kar liya. Wo teen murshideen Hazrat Syed Muhammad Sarfaraz Mehdi Tashreefullahi sahab, Hazrat Syed Alam miyan sahab Ahl-e-Hasteda aur Hazrat Syed Mubarak Yadullahi sahab Ahl-e-Baroda the. Munawar Ishaqi sahab ne ye naam Syed Taseen Agha sahab ko de diye Jo Unhon ne apne mureed Tajammul ko bata diye.

Phir Syed Taseen Agha sahab ne Bhai Munawar ko bataaya ke Tajammul ko Hazrat Sarfaraz Miyan sahab ki moujoodgi qubool nahin hai aur wo jaanta hi nahi hai ke Hazrat Alam Miyan Sahab ke naam ke Hyderabad main koi Murshid bhi hain. Jaisa ke tamaam mahdavi jo hyderabad mein rehte hain jaante hain ke Hazrat Alam miyan sahab Hazrat Hussain Miran sahab Ahl-e-Hasteda ke farzand aur ek azeem silsila-e-irshad ke murshid hain. Lekin nazireen ghour farmayein ke Tajammul kis darje ka bad akhlaq aur maghroor shakhs hai ke us ne Alam miyan sahab ko pehchaanne se hi inkaar kar diya. Gharz ek murshid ko to isne qubool karne se Inkar kardia, dusre ko pehchaanne se inkaar kar diya aur us ke is tarah amadan taakhir karne ke sabab teesre murshid yaane Hazrat Mubarak Miyan sahab apne safar ki planning ke tahet Baroda wapas chale gaye.

Phir Bhai Munawar ne Syed Taseen Agha sahab se guzarish ki ke ek murshid Tajammul ki taraf se aur ek murshid meri taraf se aur ye do murshideen mil kar teesre murshid ka intekhaab kar ke saalisi bhitaan. To Tajammul ne Hazrat Syed Asim Fareed Ishaqi sahab ka naam diya, aur Meri taraf se Hazrat Syed Alam miyan Sahab tayyaar hue aur 25 September ko saalisi ka ijlaas tayy hua. Lekin jab saalisi ka waqt aaya to Tajammul ne qasadan aur besharmi se raah-e-faraar ikhitiyaar ki. Ek mujrim aur kar bhi kya sakta tha! Is waqiye ke gawaah donon murshideen hain.

Is dauraan WhatsApp groups main bahas mubahis ko dekh kar apne jazba-e-qaumi ki tahreek par Janab Saber Ali Khan sahab ne saalisi ke liye bhai Munawar se aur Tajammul se baat ki, kyun ke wo donon fareeqain se waaqif the. Unhon ne koshish ki ke kisi teen murshideen ki saalisi ke zariye is maamle ka hal ho jaae. Doosri taraf Hazrat Sarfaraz Miyan sahab ne khud Syed Taseen Agha sahab se baat ki aur un se guzarish ki ke kisi surat fareeqain muqarrara murshideen ki maujoodgi mein aapas mein baith kar is masle ka hal karlein, taa ke hamaara qaumi masla Police ya adaalat tak na pahunche. Syed Taseen Agha sahab ne Mashwara diya ke ek kaasib admi ko fareeqain ke mabain irtebaat ke liye muqarrar kiya jaae jo donon se baat kar sake aur ek saalisi ki nishist ka ehtemaam kar sake. Hazrat Sarfaraz Miyan sahab ne Mohammed Javed Mehdi ka naam liya kyun ke wo Tajammul ke himaayati hain aur jin ke saath kaam na karne ka tajammul ko koi bahaana na mile. Lekin apne murshid ka faisla bhi is maghroor ko qubool nahi tha aur us ne Hazrat Sarfaraz miyan sahab ko ye keh diya ke main website ki chori par baat karne tayyaar nahi hoon balke sirf aqeeda ke masle par baat karne k liye tayyar hoon. Is baat se Tajammul ne aeteraaf kar liya ke wo ek chor hai aur us ke dil mein chori hai jis ki wajah se wo website ke mutalliq baat karne ke liye tayyaar nahin hua warna jis shakhs ka dil aur zameer saaf ho wo is tarah ki harkat hargiz nahi karta.

Lekin Saber Ali Khan sahab ke israar par us ne saalisi par razamandi ka izhaar kiya aur apni taraf se Hazrat Syed Asim Fareed Sahab ka naam pesh kiya lekin saalisi ke ijlaas se pehle ek din ki mohlat maangi. Gharz ek din ki mohlat ke waqfe ke baad saalisi ke waqt aur jagah muqarrar kar ke donon fareeqain ko ittela kar di gayi ke saalisi ka ijlaas 10 October 2021 ko hoga. Is baar meri taraf se Hazrat Syed Ismail Tanveer Mujtahedi sahab Ahl-e-Daira-e-Kalaan the, Tajammul ki taraf se Hazrat Syed Asim Fareed Ishaqi sahab aur teesre murshid Hazrat Syed Mohammed Noorullah miyan sahab Ahl-e-Pindiyaal the. Bhai Munawar aur kuch deeni bhai hamaari taraf se muqarrara waqt par muqarrara jagah yaane Hauz ki masjid Musheerabad pohanch gaye lekin Tajammul aur us ke saathi wahaan nahin aaye. Bhai Syed Yaqoob Shafi Mehdi sahab ne wo video afraad e qaum ko waaqif rakhne ki gharz se social media par share

kardi thi jis mein murshideen aur hamaare log to dekhe ja sakte hain lekin Tajammul aur us ke saathi ghair haazir hain. Hazrat Syed Asim Fareed Ishaqi sahab ne bhi ittela bheji ke jab Tajammul ka hi aane ka irada nahin hai to un ka musheerabad safar karna be-faiz hoga. Tajammul ki ghair haaziri ne ye sabit kar diya ke Jhoot aur fareb jis ki fitrat hoti hai wo apne waade wafa nahi karte aur isi tarha munh chhupaate aur daaman churaate phirte hain.

Saber ali khan sahab se waada karne ke baad bhi Tajammul ijlaas-e-saalisi mein nahi aaya. Jab Saber Ali Khan sahab ne kisi group mein is ki waada khilaafi par apni naraazgi ka izhaar kiya to Tajammul ne un ki tauheen ki aur tauheen amaiz audios bana kar whatsapp groups mein bhi share kiye. Chunke baat ko torh marorh kar aur adhoori baat bata kar logon ko dhoka dena aur logon par apne dil se fatwe lagaana us ka puraana wateera hai, is dafa bhi us ne aisa hi kiya. Ittefaaqan us ne inhi audios mein apni munafiqat par se parda uth jaane ke ghusse mein **“us ki website”** keh kar iqraar bhi kar liya ke website meri hai aur us ka haqeeqi maalik main hoon aur wo khud mehez ek ghaasib mutasarriif shakhs hai. SubhanAllah, jab Allah chahta hai to isi tarah chor khud apni zabaan se saamme waale ki milkiyat aur apni chori ka aeteraaf karte hain.

Beherhaal Sabir Ali Khan sahab ne is se darkhaast ki ke poori baat cheet ke audios groups mein share kare, naa ki aadhe adhoore take logon ko maloom ho ke aakhir donon ke darmiyaan poori baat kya hui thi. Is ke doosre din jab ye Saber Ali Khan se Mila to Unhon ne Is ki bad-akhlaaqi ke baare mein sawaal kiya to aag bagula ho gaya aur bajaee apni bad-akhlaaqi par naadim hone ke un par hamla aawar ho gaya, jis ke chalte fareeqain mein jharhap ho gayi. Is fasaad ka sehra bhi Tajammul ke sar hi jaata hai.

Waazeh rahe ke isi asna mein Khundmir Musheerabadi ne apne youtube channel “Rehbar-erawan sadi” ko delete kar diya, jis ke zariye us ne wo video nashr ki thi jis mein Khalifatullahmehdi website ke khilaaf jhoot kaha tha. Us ke baad wo video aur kae barelviyat ki taleem deni waali dusri videos delete karne ke baad Khundmir Musheerabadi ne sirf chand videos ke saath us channel ko dobara shuru kiya. Is se sabit hota hai ke wo apne jurm k nishan mitane ki nakaam koshish kar raha tha lekin Alhumdulillah us video ki copy humaray paas mahfooz hai.

Tajammul aur us ke deegar mujrim saathi ab tak apne jurm ko chhupaane ke liye aqeede ko sahaara banaate aaye hain lekin is faraib ki qalai us waqt khul gayi jab Tajammul ne apne ek voice message mein Imamuna AS ki us naql-e-mubarak jis mein Aap ne usool-e-deen aur furuw ki wazaahat farmaayi hai, us naql-e-mubarak ko alaania nazar andaaz kar ke apni jaanib se usool-e-deen tayy karne ki jurrat ki, jis se andaaza hota hai ke ye shakhs kis qadr sar-kash ho chuka hai. Isi sar-kashi ke chalte us ki zabaan is hadd tak kharaab ho chuki hai ki us ne apne us voice message mein Qaum-e-Mahdavia ke buniyaadi aqaaid maslan Taswiyat-e-Khatimain AS aur munkireen-e-Mehdi AS ke peeche namaaz na parhhne aur Akabireen-e-Mahdavia ki taqleed mein jumma na parhhne ko ghutne, takhne aur talvon se tashbeeh di hai aur furuwi masaail ko dil se tashbeeh di thi.

Lihaaza Tajammul ke makr o faraib aur murshideen ki be-adabi aur apne hi murshid ke zariye kiye gaye saalisi ke waade ko wafa na karne ke chalte ab ye chori ka maamla police aur adaalat tak puhanch gaya hai. Tajammul ke musalsal makr o faraib se ayaan hai ke wo shuru se yahi chahta tha ke baat adaalat tak puhanche aur ye maamla hindustani adaalati nizaam ki sust raftaari ke sabab saalon iltewa mein parh jaae aur Quran aur Mahdi AS ki taleemaat par zor dene waali qaumi website talf hojaae. Lekin Allah ke fazal se aur Khatimain AHS ke sadqe se ham website ke domain name ko sirf ek izaafi hurf ke saath dobaraara online laane mein kaamyaab hogaye hain. InshaAllah ye website Quran aur Mahdi AS ki haqeeqi taleemaat ko ghair mahdavia baatil aqaaid ki milaawat se mubarra apni asli shakal mein pesh karti rahegi.

Faqt,

Aap ka deeni bhai

Syed Mehmood Hasheer Ghazi

Ahl-e-Maindargi